

大乘集菩薩學論卷第十八第十九卷 轉九

法 稱 菩 薩 造

宋西天正藏朝散大夫試鴻臚少卿宣梵大師日稱等奉詔譯

自性清淨品第十四之二

大王是外地界堅硬性者爾時世間初建梵

天所居宮殿轉九大寶所成復生他化自在諸天

所居宮殿皆七寶成大王若無地界堅硬性

生彼何所來復成大地厚八萬四千踰繕那

縱廣六萬踰繕那復生輪圍大輪圍山堅固

安住同一金剛復生蘇彌盧山庾健陀山顛

泯陀山伊舍陀山乃至黑山如是三千大千

世界次第成已堅固安住若無地界堅硬性

生彼何所來大王又此世界欲壞滅時或為

火焚或為水漂或為風吹而此大地為火燒

時譬如酥油其焰彌熾乃至煤燼不復可見

若為水漂如投鹽水中尋即消壞若為毗嵐風所吹時彼三千大千世界悉皆散壞淨盡無餘大王此外地界生時本空滅時亦空自性空故無有男相亦無女相但唯言說之所顯示如是地界與地界性皆不可得如實正慧而能了知云何內水界若此身內所有執受濕潤等性彼復云何所謂涎汗涕唾脂髓膿血洩便等物為內水界大王若時忽見親愛人等眼中流淚或為苦惱所逼流淚或聞深法信重流淚或為寒風所吹流淚如是水界從何所來水相乾時復何所去乃至此界壞時徧興黑雲三十二重彌覆三千大千世界於虛空中降澍洪雨點大如象晝夜傾注相續不絕如是時分經五中劫其水積滿上至梵世大王此大水界從何所來又此世界

將欲壞時有二日出二日出已小河泉源悉
皆乾竭三日出時無熱惱池流出四河亦皆
枯涸四日出時大海水減一踰繕那或二或
三漸次減少至十踰繕那或二十踰繕那次
第枯竭至八十踰繕那有餘水在或深一多
羅樹或深至曾臆或深如牛跡乃至少水深
一指面當爾之時大海中水悉皆乾竭淨盡
無餘大王此水界相生無所來滅無所去生
時本空滅時亦空自性空故無有男相亦無
女相但唯言說之所顯示如是水界與水界
性皆不可得云何身內火界若此身中所有
執受溫熱等性彼復云何所謂溫暖蒸熱咀
嚼飲食成熟變壞使令安樂入熱數者名內
火界云何外火界謂不執受溫熱相生若復
有人於曠野中尋求火緣或以蒿艾或牛糞

屑或兜羅綿引火生已或燒草木山林聚落
及餘方處皆為所燒大王如是火界生無所
來滅無所去從本已來自性離故云何身內
風界輕動等性彼復云何謂此內風或時上
行或時下行或住腹間或脇或背或發隱疹
或聚成塊或如刀裂或如針刺出入息等徧
滿身肢外風界者謂若此風從四方來或緊
如箭或利如刃若狂暴起摧折林木墮裂山
峯若微細起飄舉身衣動多羅樹名外風界
餘如前說云何內空界若此身內皮肉血等
顯現增長離質礙性彼復云何謂若眼竅耳
穴面門咽喉嚙噉飲食所引滋味於腸胃間
通徹而出若時業緣引生六處諸處生已圍
繞空界此說名入內空界數然彼空界從何
所來若復外所顯現離質礙性名外空界大

王若色變壞一切皆空所以者何是虛空界本無盡故安住不動猶如涅槃徧一切處無有障礙大王譬如有人於彼高原穿鑿池井於意云何是池井中所有空相從何所來王言無所從來佛言大王設使彼人復填以土於意云何空何所去王言空無所去所以者何是虛空界無去來故不住男相不住女相大王外虛空界本來無動所以者何自性離故如實正慧而能了知復次大王云何識界謂若眼根爲主各別所緣顯色形色及以表色名眼識界若六根爲主緣於六境各別建立名六識界又此識界不著於根不住境界非內非外及二中間然此識界各各了別彼彼事已即便滅謝生無所來滅無所去大王識生時空滅時亦空自性空故不住男相亦

非女相但唯言說之所顯示如是識界與識界性皆不可得如實正慧而能了知大王云何眼處謂四大種地界水界火界風界所造淨色若地界清淨則眼處清淨若水火風界清淨則眼處清淨何以故由地界清淨眼處得生是中無有少法可得如是乃至由風界清淨眼處得生是中無有少法可得何以故無主宰故無造作故猶如涅槃自性淨故大王如是眼處各各尋求皆不可得所以者何由地界空故則地界清淨乃至風界空故則風界清淨若諸法自性本空則彼界何有清淨亦無忿諍若淨若諍皆不可得復有何色而可見耶當知眼處畢竟空故自性亦空前際後際皆不可得未來所造亦不可得何以故自性離故若自性無有則無男相亦無女

相何有愛樂若生愛樂是魔境界若無愛樂是佛境界何以故若無愛樂則能遠離一切諸法大王云何耳處謂四大種所造淨色乃至大王諸法解脫決定現前如法界空不可施設不可顯示不可記別無所希望大王諸根各各樂著境界眼緣色時而生樂著是故說色爲眼境界又此眼根緣於色境有三種相矚可愛色起於貪想不可愛色起於嗔想非愛非惡而起捨想如是乃至意著法處爲意境界若彼意處緣可愛色極生樂著爲彼所牽引生貪行不可愛色生於嗔行於愛非愛起於癡行如是聲等三種攀緣領納等相准前應說大王當知諸根如幻境界如夢譬如有入於睡夢中與諸綵女共相娛樂大王於意云何彼夢覺已憶念夢中綵女娛樂爲

轉九

五

實有不王言不也世尊大王於意云何是人所夢執謂爲實爲智者不不也世尊何以故夢中所見衆人綵女畢竟無有何況與之共相娛樂當知是人徒自疲勞念夢中境不復可得佛言大王如是如是愚癡異生眼見色已心生愛樂復起執著爲彼所牽造貪業行身業三種語業四種意業三種最初造作剎那滅謝不依東方南西北方四維上下中間而住於死邊際命根滅時自分業報皆悉現前猶如夢覺念夢中事大王識爲其主業爲攀緣二種相因初識生起或趣地獄或墮旁生琰摩羅界及阿蘇囉若人若天初識生已各受其報同分心品相續隨轉最後識滅名爲死蘊最初識起名爲生蘊大王當知無有少法從於此世得至他世所以者何性生滅

故大王身識生時無所從來滅無所去彼業生時無所從來滅無所去初識生時無所從來滅無所去何以故自性離故如是了知身識身識空自業自業空初識初識空若滅滅空若生生空了知業縛無有作者亦無受者但名想耳復次大王譬若有人於睡夢中與諸寃對共相鬪戰於意云何是人覺已憶念夢中鬪戰等事爲實有不王言不也世尊佛言大王於意云何是人所夢執謂爲實爲智者不不也世尊何以故夢中畢竟無有寃對何況與之共相鬪戰是人徒自憂惱都無有實佛言大王如是如是愚癡異生眼見惡色即生於惱厭離破壞毀些過失造瞋業行餘同前說復次大王譬若有人於睡夢中爲毗舍遮之所燒害心生怖畏癡迷悶絕大王於

轉九

六

意云何是人覺已憶念夢中爲鬼所燒爲實爾不不也世尊夢中畢竟無鬼所惱況癡迷耶佛言大王如是如是愚癡異生眼見是色癡迷不了造癡業行餘如前說復次大王譬如夢中得聞衆人美妙歌聲箜篌絃管諸音樂等大王於意云何是人覺已憶念夢中所

有歌樂爲實爾不王曰不也世尊佛言大王於意云何是人所夢執謂爲實是爲智不也世尊何以故夢中衆人尚不可得何況美妙諸樂音聲是人徒自疲勞畢竟無有佛言大王如是如是愚癡異生聞可意聲聞已適悅復生樂著造貪業行如是香等各各三種准前應知乃至大王於此法中善自安意應作是念我當云何於人天中爲作眼目爲大燈炬而作照明爲作船師令渡彼岸爲大商

主引至寶處未解脫者令得解脫未安隱者
令其安隱未涅槃者令證涅槃大王當知諸
根如幻境界如夢凡夫縛著無有厭足乃往
過去無量世時有轉輪王名無量稱威德名
聞富貴自在統四大洲獨爲尊勝隨所意樂
而得受用一切林樹常有花果時世人民安
隱無惱復能降雨衆妙香水金銀珍寶種種
資具諸有所須普皆充足忽於一時昇忉利
天帝釋天主分座令坐貪欲無厭欲侵其位
作是念已即便退沒羣臣圍繞咸共見之譬
如生酥置熱沙中不得久住將趣命終爾時
有王名曰作愛見是事已而作是言我當云
何於諸世間善說斯事時無量稱語作愛言
汝於未來當如是說彼無量稱貪無厭故自
取命終乃至是故大王諸根如幻境界如夢

當自安意勿生信順身如陽燄自性無有色
受想行自性不實亦復如是

大乘集菩薩學論卷第十八